

P. PUK. DR MIROSLAV ŠVARC
(19. IV 1903 — 14. III 1970)

Jakob A. GAON

Kobnim udesom u saobraćajnoj nesreći u Sarajevu nestao je 14. III 1970 godine iz naše sredine, još uvijek vrlo aktivan istaknuti ljekar, poz-



P. puk. dr Miroslav Švarc

nati društveni radnik i veliki pobornik za socijalističke i humane odnose među ljudima.

Dr Miroslav Švarc rođen je 19. IV 1903. godine u Kupresu. Gimnaziju je završio u Sarajevu, a Medicinski fakultet u Beču. Specijalizaciju iz bolesti usta i zuba počeo u Parizu, a završio u Beču kod dr Pichlera.

Najveći dio svoje lekarske karijere dr Švarc je proveo u vojnom sanitetu, angažujući se najviše na organizaciji rehabilitacije ranjenika, pa zatim u svojoj osnovnoj struci — stomatologiji. Njegova pomoć civilnoj zdravstvenoj službi u organizaciji preventivne zaštite stanovništva, a naročito djece, od bolesti zuba, visoko je stručno ocijenjena i predstavlja početak toga vida zdravstvene zaštite u SR Bosni i Hercegovini.

Poslije penzionisanja i izlaska iz Armije u činu sanitetskog potpukovnika, dr Švarc je radio nekoliko godina kao upravnik Doma zdravlja „Omer Maslić” u Novom Sarajevu, a zatim kao viši zdravstveni savjetnik u Komunalnom zavodu za socijalno osiguranje, u Sarajevu. Odličan organizator i dobar poznavao naših prilika na terenu, on je uvijek potencirao preventivni vid zdravstvene zaštite. Mnogi dispanzeri, savjetovaništa, kao i mnogobrojne akcije zdravstvene službe u Sarajevu i u unutrašnjosti, nisu se mogle zamisliti bez velikog i nesebičnog zalaganja dr Švarca. Takav rad ga je posebno isticao među ljekarima grada Sarajeva, koji su ga nekoliko puta birali za predsjednika Podružnice Društva ljekara. Bio je član Naučnog društva za istoriju zdravstvene kulture Jugoslavije. On je više puta bio odlikovan.

Smrt ovakvog ljekara, nada sve dobrog čovjeka, istaknutog društvenog radnika, mobilizatora zdravstvenih radnika za visoko etički rad, za humanizam i socijalnu pravdu znače veliki gubitak za zdravstvenu službu i za društvo u kojem je djelovao.

Neka ovakav primjer predanog rada i svjetla uspomena na dr Miroslava Švarca bude, ako je to moguće, bar donekle utjeha za njegovu porodicu.

Slava i hvala dr Miroslavu Švarcu.